

19/12/1997

Akta baru beri peluang penagih serah diri

reports on "Dewan Rakyat" by Bakhari Ariff; Meor Hisham Zulkifli  
KUALA LUMPUR, Khamis - Kerajaan memberi peluang seluas-luasnya kepada penagih dadah untuk menawarkan diri secara sukarela menjalani program pemulihan menerusi pindaan Rang Undang-Undang Penagih Dadah (Rawatan Pemulihan) 1997.

Timbalan Menteri Dalam Negeri, Datuk Ong Ka Ting, berkata sehubungan itu penjaga penagih terbabit tidak dikenakan sebarang ikat jamin berbanding akta sebelum ini.

Menurutnya, setakat ini kurang satu peratus saja penagih yang secara sukarela menjalani pemulihan berbanding tangkapan yang dibuat oleh polis.

"Kita mengetahui penjaga kepada penagih tidak berkemampuan untuk membayar ikat jamin apabila ditangkap oleh polis menyebabkan mereka tidak sanggup menyerahkan ahli keluarganya yang menagih.

"Akta sebelum ini tidak menggalakkan penagih menawarkan diri untuk memasuki pusat serenti," katanya ketika membentangkan pindaan akta itu bagi bacaan kali kedua di Dewan Rakyat, hari ini.

Pindaan akta itu selaras dengan penubuhan Agensi Dadah Kebangsaan (ADK) dan Majlis Dadah Kebangsaan (MDK) yang dipengerusikan oleh Perdana Menteri, Datuk Seri Dr Mahathir Mohamad pada 1996.

MDK mencadangkan kaedah pemulihan baru dan dengan itu Akta Penagih Dadah 1983 perlu dipinda.

Ong berkata, kerajaan juga bercadang menggunakan klasifikasi pusat pemulihan bagi menambah keberkesanan program pemulihan.

Klasifikasi itu ialah mengikut pusat serenti penagih yang menawarkan diri secara sukarela, remaja, ringan, wanita dan penagih tegar.

Menurutnya, penagih tegar yang bilangannya 64 peratus daripada 12,916 lebih sukar dipulihkan berbanding penagih baru.

"Penagih tegar biasanya terdiri daripada mereka yang menagih semula, terkena penyakit Aids/HIV atau mereka yang pernah melarikan diri dari pusat pemulihan.

"Kemasukan penagih tegar bercampur aduk dengan penagih baru menyebabkan program pemulihan tidak berjaya sepenuhnya dan memungkinkan tercetus mogok, gaduh dan lari dari pusat serenti," katanya.

Mengenai rawatan lanjutan, Ong berkata pindaan akta berkenaan mewajibkan setiap penagih yang menjalani rawatan di pusat pemulihan untuk mendaftar dengan polis di kawasan berdekatan.

"Pindaan ini bagi mengurangkan penagih menagih semula," katanya.

Penagih yang tidak mematuhi peraturan ini boleh dikenakan maksimum penjara tiga tahun atau sebatan tiga kali atau kedua-duanya.

Ong berkata, pindaan itu juga mengenakan denda yang lebih tinggi kepada pegawai yang menyeludup dadah kepada penagih di pusat pemulihan. Denda baru itu mengenakan RM2,000 dan mandatori sebatan tiga kali berbanding kadar lama hanya RM500.

"Denda ini akan mengelak pegawai di pusat serenti memberikan dadah kepada pelatih, sekali gus menjayakan program pemulihan," katanya.

(END)